



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 3

Yangia anidakangma :



Tir Yimiyim



tir_yimiyim



tir yimiyim

TAPAK 7

West Asia nung rara ajanga rongsenketziung kongshitsü: Rajnath Singh

Iran-i kidanger linüktem amakba anena atatsü: Pezeshkian

VOL. XXIII ISSUE NO. 144 (ADOK 144) DIMAPUR AMUNGNÜ (SUNDAY) METSÜREMI (MARCH) 08, 2026 ₹ 5.00

Domestic LPG cylinder nung Rs 60 tuogo

New Delhi, March 7, 2026 (Agencies): March 7, 2026 nungi India nung domestic LPG cylinders jengang tuogo aser seret 14.2 cooking gas cylinder ka nung Rs 60 kumogo ta Indian Oil Corporation (IOC)-i metetdaksü.

Tanü nungisa seret 19 commercial LPG cylinder nunga Rs 115 teimba kumogo aser iba ajanga hotels, restaurants aser small commercial establishments nung kongshio.

Iba ajanga Delhi nung 14.2-kg non-subsidised domestic LPG cylinder jengang Rs 853 aliba nungi Rs 913 kumogo. kibongtemi Pradhan Mantri Ujjwala Yojana dak alia iba LPG telemsa ya kanga amshir.

West Asia nung rara ajanga alima energy prices tuogo aser iba ajanga jengang atutsüsa akümer ta industry ketdangsürtemi ashi. Jengang tuaka kidanger linüktem dang nungi India nung cooking gas jengang dalangba lir.

Tesüiba ita 11 tsungda India nung LPG jengangtem anaben reprangshio. Yaküm April ita India nung domestic cylinder shia nung Rs 50 ajungketa liasü.

2016 kum tenzükba sülen Ujjwala scheme indang beneficiary temi LPG connections angati angur aser iba ya kilen crore 10 tema lir. Parnoki kumshia 14.2-kg cylinder ka nung Rs 300 subsidy

angutsü aser iba ya kum nung cylinder refill 12 atema lir.

Tanü jengang atuba sülen Delhi nung commercial cylinder ka nung Rs 1,883 kumogo.

Union Minister for Petroleum and Natural Gas Hardeep Singh Puri-i anogo ishika tejakdang India nung energy supply aser fuel peria dang lir ta shia liasü.

"India nung totzü peria dang rizünga lir aser akhi ama supply aser distribution networks inyakdar. IndianOil-i linük ajungalen fuel supply shitak agütsütsü anungji sensotemi petsaprong masütsü aser fuel stations nung telok adenshia meraktepsü mepishir" ta Indian Oil Corporation-ia metetdaksüogo.

2022 nungi India-i Russia nungi crude oil bener arur aser taküm February ita India-i Russia nungi total crude oil imports 20% shi bener aruogo aser iba ya anogo ka nung 1.04 million barrels shi lir.

Centre sorkari LPG refineries dang linük ajungalen peria angutsü atema production teimba akümtsü tetuyuba agütsüogo.

Taküm January nungi India-i US nungi LPG agir. November 2025 nung Indian PSU Oil company temi contract year 2026 atema US Gulf Coast nungi LPG 2.2 MTPA shi bener arutsü atema contract ka nung sign sütepogo.

Assam sorkari tetsürtem asoshi SHe-Box tenzük

Guwahati, March 7, 2026 (Agencies): Assam sorkar mapa inyakker tetsürtem kumzuka ayutsü atema department ajak nung Sexual Harassment Electronic Box (SHe-Box) inyakim tenzükogo.

SHe-Box ya Assam government department shia nung ayutsü aser iba nung tetsürtemi pei tenung miimbang yur tim masüba ken o tem benoktetsü. Tetsür sorkar mapa inyakertemi online ajanga ken o agütsütsü, parnoki benokba ken o inyakba aoba osang reprangtetsü

aser secure system ajanga mapang shia osangtem angutsü.

Assam sorkari Revenue and Disaster Management Department nung Additional Secretary aser Assam Civil Service officer Hemashri Hazarika-i iba inyakim atema Nodal Officer shimogo.

SHe-Box ajanga mapa inyakdak timtem ajuruba tetsürtem yaritsü aser iba ya Sexual Harassment of Women at Workplace (Prevention, Prohibition and Redressal) Act, 2013 den putepa lir.

Garo Hills nung non-tribals ali kibur makümtsü

Guwahati, March 7, 2026 (Agencies): Garo Hills Autonomous District Council (GHADC)-i Garo Hills district pungu nung non-tribals ali kibur makümtsü atema tetuyuba ka agütsüogo.

MDC elections nung candidate temi ST certificates agütsütsü tetuyuba agütsüba sülen iba

lemtet agiogo.

Iba tenokdangba ajanga Garo Hills nung ali alia aliba non-tribals mekongshitsü ta ketdangsürtemi metetdaksüogo.

Iba lemtet ya lisopur ali, sobaliba temetentem aser ali kibur süa aruba inyakim kumzuka ayutsü atema agiogo ta GHADC-i ashi.

Minister C.L. John-i tetsürtem kumzuka ayutsü ayongzük



January 7, 2026 nü Kohima nung International Women's Day sentong nung agiba noksa ka angur.

Kohima, March 7, 2026 (TYO): Tetsürtem dak tashiyim inyakba azüoktsü aser kasa maongka agütsütsü asoshi külemi yaritepa inyaktsüla ta Forest, Environment and Climate Change Minister C. L. John-i ashi.

Tetsürtemi loktiliba nung tongtipang shilem agiaka item tebilemsüttem ajanga parnok nem tashi itdaksüba nung tetsükdaksü ajurur ta pai ashi.

"Kohima nung International Women's Day sentong nung jembidang "iba anogo ya tetsürtem benjungba dang masü saka parnoki bendanga agütsüba, timtemba aser tongtetbatem agizükba anogo ka lir" ta Minister John-i ashi.

Iba sentong ya "Rights, Justice, Action: For All Women and Girls" omen nung ajemdaker Department of Social Welfare, Nagaland-i Nagaland State Commission for Women, Nagaland State Rural Livelihoods Mission, Directorate of Women Resource Development aser Kohima Municipal Council den yaritepa ayongzük.

"Naga tsürtemi loktiliba yangerba nung tongtipang shilem agir aser parnok ya kibongtem, yimsüngtem aser loktitem asoshi tongtoret lir. Alu nungi shishilembadak, classroom nungi mozükitem tashi tetsürtemi anibelem arema terenlok atema inyakker" ta John-i ashi.

Sorkar ketdangsübaren aser lokti leniba nung tetsürtemi shilem tulu agir. Nagaland state assembly nung tang tetsür MLA ana lir aser ano Rajya Sabha MP ka lir ta paisa ashi.

Nagaland nung mezüngbuba tetsür Member of Parliament Rano M. Shaiza-i tarutsü pututem asoshi lenisüba lenmang lapoka yutsü ta paisa ashi.

Tetsürtem dak tashiyim inyakba ya tangsa azüoktsüla, kechiyong iba ya human rights alema lir. Nagaland nung tanur tetsür shiai temulung ulua, akhümketa aser kasa maongka ngua aintsü atema asenok longjemer inyaktsüla ta Minister John-isa ayongzük.

2026 benjung ya tetsür temetentem aser terenlok nung tenokdangbatem agientsü atema

lir ta Social Welfare Advisor Wangpang Konyak-ia ashi.

"Nagaland State Commission for Women-i tetsürtem tashi itdaksütsü atema kanga meranga inyakker. Parnoki reju balala aser sendaktepa alirtem den yaritepa tetsür-tebur jengang kasa asütsü atema inyakba arur" ta pai ashi.

Commission-i 2021 nungi NSCW Awards tenzük aser iba ya women achievers ajiteta tushitsü atema lir ta paisa shisem.

National Crime Records Bureau ajanga Nagaland ya tetsürtem lendong nungi jenbua aliba tesem ka ta shiogo saka kumtem süia arudang tetsürtem dak tashiyim inyakba kanga bulua ataloker ta Wangpang Konyak-isa ashi.

Nagaland nung 2016 nungi One Stop Centre ajanga tetsürtem dak tashiyim inyakba ken o 1,800 tema agizüka inyakogo saka tatalokba aika mashi miimbanger ta Social Welfare Secretary, Limawabang Jamir-i ashi.

Mission Shakti scheme ajanga tetsürtem safety, security aser empowerment atema inyakker ta pai ashi.

Nagaland nung district lemsar 'Mahila Jan Sunwai' agitsü

Kohima, March 7, 2026 (TYO): International Women's Day tenung nung National Commission for Women-i Nagaland State Commission for Women (NSCW) den yaritepa March 9 nugi 13 tashi "Mahila Jan Sunwai" (public hearings) ayongzuka agitsü.

"Item sentong ajanga tetsürtemi parnok tebilemsülem lemsatepsü aser teyari bushitsü sabang ka angutsü" ta NSCW chairperson W. Ngingyeh Konyak-ia ashi.

Hopta piyong sentong ajanga tetsürtemi kibong timtem, mapa inyakdak khuret ajuruba, maternity benefits, shibelenba aser tanga ozüng alema inyakba ken o tem benoktsü akok.



W. Ngingyeh Konyak

Item public hearings mapang Nagaland State Commission for Women, district administration, District Legal Services Authority, police, legal experts aser protection officers alitsü ta laisa metetdaksü.

Iba sentong ya district 12 nung DC Conference Halls nung sentong tenzüksü. Hombarnü Tuensang, Zunheboto, Tseminyu aser Wokha district tem, March 10 nü Mokokchung o Niuland, March 11 nü Chümoukedima, March 12 nü Longleng o Peren aser March 13 Mon, Kohima o Dimapur nung agitsü.

Tanga district pungu nung Jan Sunwai alitsü saka yaser ang agitsü ta NSCW chairperson Ngingyeh-isa ashi.

SANKALP: DHEW, Mission Shakti o Watsü Mungdang na senteper IWD amung



Mokokchung, 8th March (TYO): Taküm alima ajunga nung shimtetba omen "Rights. Justice. Action. For All Women and Girls" dak rangloker Watsü Mungdang den yaritepa Mission Shakti, Mokokchung kübok SANKALP: District Hub for Empowerment of Women (DHEW)-i ayonga 'International Women's Day 2026' sentong ka Aor Kilem, Mokokchung nung meraketa mungogo.

Omen dak ajemdaker EAC, Aghunato, Wt. Kathyinla Jamir-i jembidang, tetsür aser tetsür tanur atema temeten kasa aser ochi obendang agütsütsü asoshi külemi inyaksü kanga tongtibang ta ashi aser laisa

tetsürtemi terenlok angutsü aser lokti nung tajangzük bener arutsü asoshi tawajem maongka aser tenungitba inyakyim asoshi ola adoktsü ajungshia liasü.

District Mission Coordinator, District Hub for Empowerment of Women (DHEW), Mokokchung, Wt. Moamenla Longkumer-i Mission Shakti nükjidong aser maparen indang lemsatepba den district level nung inyakyim balala ajanga tetsürtem kümzüka ayutsü aser tashi itdaksütsü atema sorkari inyakyim akangshitsü asoshi tenangzükba agibatam metetedaktsü.

Iba sentong nung Dr. Sentirenla Ozukum (Sen-Bakes) aser Wt. Asenla

(Founder, First Rain Foundation) nadi tetsürtem jenjang indang aser kechisarena nung tensa tia ajak tizükteta otetsü aser tashi ita aotsü asoshi nübur/lokti teyari nungdakba indang parnoki ajangshibatam kuli dena lemsatep.

Iba sentong nung Wt. Nichet Jamir menden liasü aser lai International Women's Day amungba nükjidong lemsatep. Mokokchung Compound Baptist Arogo, Associate Pastor (W), Wt. Nungshinaro-i sentong moaja sarasadem. Alempang Watsü Telen-i wawa-menü ka ia tesentepertem peladaktsü. Watsü Mungdang tir, Wt. Tianaro Jamir-i tepela o metetedaktsü.

Jail Committee züngsemtemi District Jailtem semdang



Dimapur, Metsüremi/March 7 (TYO): Neiko Akami, NJS, Member Secretary, NSLSA aser Solezhol Neikha, Sr. Superintendent of Police, Central Jail Dimapur nati anir Jail Committee züngsemtem aser District & Session's Judge cum Chairman ZDLSA Phuleto Yeptho, NJS, LADCs aser Panel Lawyers ZDLSA temi Zunheboto District Jail semdangogo.

Member Secretary (NSLSA) aser züngsemtemi tepuokdak alirtem den sensaksema liasü. (JCM)

Member Secretary NSLSA Neiko Akami, NJS-i, inmates Reformation, vocational training benokba, angati legal teyari, tepuokdak alirtem meraket wazüka ayutsüba aser tanaben aibelen memenatsü asoshi rehabilitation dak rangloker inyaksüba amala tongtibang önüktem lemsatepa liasü.

Sr. S.P Central Jail Dimapur Solezhol Neikha-i, taah structure densema tepuokkertem

remuneration, legal standing indang jembiba. Taah balala ya tepuokkertem rehabilitation inyakyim nung shilem ka lir, koba parnok tepuokdak nungi tuguba sülen lokti den adongoksema aotsü asoshi tasa balala angazükdaktsütsü aser senotsü rezünga toktsütsü asoshi lir. Ordinary aser special Renumeration ya yimayimpong tajung, industrial labour mesüra tangar dak nungi alia service tajungba agütsüba ajanga tepuokdak ayutsü asoshi mapang tajemba kümdaktsüba indang jembiba lir.

Kasa mapang nung District aser Session's Judge cum Chairman ZDLSA Phuleto Yeptho NJS-i, Under-Trial Prisoner (UTPs) aser Convicts na tebendang indang jembiba liasü. Tepuokdak nükjidongji aibenelettem anema inyaksü asoshi masü. Iba ya tangazükba shitak agüja tepuokkertem nisung tajungba ka kümdaktsütsü nükjidong nung amenokba lir, ajita asünung dang parnok ya

senso tajung ka aser lokti nung tarutsü nung tagidak akaba nisung ka kümtetsü.

Member Secretary (NSLSA) aser JCM züngsemtemi tetsürtem ward nung Western Commode amenoktsü aser tepuokdak alirtemi mepishiba ama Chapel Hall ka amenoktsü asoshi benoka liasü.

Tang District Jail Zunheboto nung UTPs 12 aser Convicts 2 puoka yua lir.

March 4 nü ano Member Secretary of the Nagaland State Legal Services Authority, Shri Neiko Akami den Tuensang District Legal Services Authority, Judicial Magistrate Kumdilong Kessen, NJS, Secretary, TDLSA, L Bumeng Khiam, Superintendent, District Jail Mokokchung, P. Herola, Retainer Lawyer, TDLSA, Antimangyang Chang, Chief LADC aser Assistant LADC Thondi Ongphang nungeri Tuensang District Jail semdangogo.

(Maneni tapak 7 nung...)

DEFCC nungi ketdangsürtemi RFRI semdang

Dimapur, Metsüremi/March 7 (TYO): Nagaland sorkar kübok Department of Environment, Forests and Climate Change (DEFCC) nungi ketdangsür ti-i March 6 nü Rain Forest Research Institute (RFRI), Jorhat, Assam semdangogo. Iba team ya Principal Secretary Y. Kikheto Sema, IAS lenisüba nung oa liasü.

Sustainable forest management, bushisingdang nung teyaritep aser Süngya aser teak amala rongsenketzung atema tongtibang süngtongtem tsünüba yimya ajungkettsü atema iba riju den longjemer inyaksü nükjidong nung iba sentong apiteta agiogo.

Ketdangsürtem ya Dr. Nitin Kulkarni, Director, RFRI aser par team-i agizüka liasü.

Director, RFRI aser par team-i bushisingdang balala indang osang tejangja agütsü. Sensaksema mapang Sema-i, Nagaland nung agroforestry atema lenmang sadema lapoka aliba aser nungdakba lemsatep. Paisa tekong lu ayimba ajanga tetsüdaktsü aika adokba indang lemsatepba den Süngya amala süngtong atemba ya ecologically sustainable asütsü aser iba yagi rongsenketzung jenjanga ajungkettsütsü ta ashi.

Süngya wazüka ayutsü aser

ajungkettsü atema Nagaland sorkari jenjang agiba indang jembiba mapang Kikheto-i ashiba agi, iba süngtong lu ayimba ajanga rongsenketzung jenjang tajungba kümdaktsütsü aliba temulung dang yur Nagaland nung Süngya süngtong wazüka ayutsü aser ajungkettsü atema policy balala yangludlar.

State nung aluyimer shilem 70 lir saka sobaliba aluyimba yimya ya rongsenketzung atema kangabo tapet masü asünung Süngya amala süngtong alu ayimba ajanga aluyimertem takarba kümdaktsütsü aser yimdak yimtsüngtem nung rongsenketzung tashi taitba kümdaktsütsü aser lanurtem nem mapa inyaksü asoshi maongka agütsütsü, ta pai ashi.

Sensaksema mapang Nagaland nungi Süngya süng chip/powder aser totzü export quota ya 3,400 kg nung latetja lir aser küm nung 180 kg dang asüba angashia Kikheto aoksa liasü, koba national quota 2.25% aser 2.55 % dang lir.

Botanical Survey of India (BSI)-i agiba Agarwood resources Non-Detrimental Finding (NDF) study dak ajemdaker quota ya lemsütsü ta parnok nem metetdakja liasü.

(Maneni tapak 7 nung...)

Dimapur nung SAMARTH sentong takok ngua agiogo



Dimapur, Metsüremi/March 7 (TYO): Ministry of Electronics and Information Technology (NIELIT), Kohima na longjemer Christian Higher Secondary School Dimapur nung March 7 nü tatemsa SAMARTH (Students Advancing Mindsets in AI, Robotics, Technology and digital Hardware) Project 2026 takok ngua agiogo.

Department of School Education Kohima ajanga school administration, tsürapurtem aser NIELIT ketdangsürtem senden amenba sülen iba training ya ayongzüka agiogo.

Training ya AIoT, Robotics, Igniting minds aser cyber hygiene dak sendakba nung kaketshirtem nem digital aser technical skills balala agütsütsü nükjidong nung ayongzüka agiogo. Ajak senteper iba training nung class 6 nungi 8 tsüngda alir kaketshir 208-i

shilem agia liasü. Sentong ya Honibar pongu; February 7, 14, 21 aser 28 aser March 7 nü agia liasü. Session shia ghonda 4 ser tesimal agi aser iba yongtsüng mapang tatsütsü anisüngzüka liasü. Training balala agütsüba nung kaketshirtemi kanga yakyaka shilem agiogo aser aika angazükogo.

March 7 nü tatembangbuba sentong nung kaketshirtem nem kuli kaket aser SAMARTH AIoT Kit box, Additional Director, Scientist-E, NIELIT Dimapur Daniel Meren-i agütsü. Iba sentong nung Principal S. Moatemsu Walling aser Vice Principal Patricia Zhimomi nata dena liasü.

School ketdangsürtemi, kaketshirtem ajak sentong ka nung khen danga methidaktsü yokba atema tsürapurtem dang kanga pelaba lemsatepogo, aser digital tarutsü ka atema kaketshirtem renema toktsütsü asoshi iba amala sentong koda tongtibang aji lemsatepa liasü.



Thane, March 07, 2026: International Women's Day anogomong atongtsü anogo ka jelia Honibarnü Thane nung tetsürtemi bike rally nung shilem agidang tangokba noksa nung angur.

India nung Petrol aser Diesel totzü jenjang matutsü

New Delhi, Metsüremi/ March 07 (Agencies): India nung petrol aser diesel totzü jenjang matutsü; kasa dang alitsü, kechiyong India-i tanga lenmang balala ajanga totzü bener arutsü, ta sorkar osang ka ajanga metetdaksü. "India-i Strait of Hormuz lenmang ajanga dang masü saka tanga lenmangtem ajanga-a totzü bener arudar. India-i totzü shilem 60 bo iba

rong lenmang (Strait of Hormuz) ajanga masü saka tanga lenmang ajanga bener arua liasü, saka tangbo shilem 70 kümogo," ta sorkar osang ka ajanga metetdaksü. Mezüngbuba totzü shilemji Strait of Hormuz nungi bener arudar, aser maneni tetsükdaksü kecha makai bener arutsü, ta sorkari metetdaksü. Opposition party temi, linük

nung totzü jenjang atutsü akok, ta jembiba mapang ka nung tang sorkari totzü jenjang matutsü osang metetdaksür. "Sorkari mezüng metetdaksübaji liquefied petroleum gas (LPG) masü saka petrol aser diesel dak sendakba dang lir. Tanüa onoki maneni lephsia ya ashir-Petrol aser Diesel jenjang matutsü," ta ketdangsertemi metetdaksü.

Karnataka nung küm 16 tekübokpurtem social media mamshidaksütsü

Bengaluru, March 07 (Agencies): Karnataka state sorkari arrshi küm 16 ser tekübok tanurtem nem social media mamshidaksütsü atema jembidar. India nung technology tiyongtsü, ta züngshiba Karnataka state nung Chief Minister Siddaramaiah-i Hokolbarnü state budget benokba mapang nung iba osangji metetdaksü. Tanurtem aser tainlonglongpurtem smart phone kanga amshiba ajanga takoksa kanga anguba nokdangtsü nükjidong nung

state sorkari tanurtem atema social media nokdangtsü. Karnataka nung technology dak sendakba telemetba agibatem ajanga tanünga linük tesem-a aika kongshir, anungji state nung iba ya takok ngua benoktetra tanünga state temia tatishitsü agia inyaksangshitsü akok. Chief Minister Siddaramaiah-i, "Arrshi küm 16 ser tekübok tanurtemi social media kanga amshitepba ajanga takoksa kanga anguba nokdangtsü nükjidong nung iba tenokdangba ya benoker," ta

metetdaksü. Linük aika nung tanurtem atema social media nokdangtsü atema shisa lemsatapa inyaksangshidar. Tawa Australia-ia arrshi küm 16 ser tekübok tanurtem atema social media platforms nokdangtsü atema ozüng ka agizükogo. Tang tesüa Indonesia-ia arrshi küm 16 ser tekübok tanurtem atema social media nokdangogo. Tang tashi nungbo Karnataka state sorkari tanurtem anema iba tenokdangbaji koma benoktsüar osang tejangja memetetdaksü.

India nung 52,360 tayimtsü ajanga Gulf nungi anir aruogo: DGCA

New Delhi, Metsüremi/ March 07 (Agencies): Hokolbar ayaterm (11:59 ako) tashi nung India nung tayimtsü, Middle East airlines aser charter tayimtsütem ajanga Gulf nungi India nung 52,360 anir aruogo, ta

Honibarnü DGCA-i metetdaksü. India nung tayimtsü 184, UAE nung tayimtsü 85 aser charter tayimtsü 11 ajanga India nungertemji kümzüka anir aruogo. Honibarnep Dubai airport bo shibanga liasü.

Honibarnep UAE nung ketdangsertemi X ajanga, "Dubai-i aruba mesüra Dubai nungi apusoba tayimtsü service ajak anena atar. Yimlibilema airport-i maotsüla. Emirates-i maneni osang metetdaksütsü," ta metetdaksü.



March 07, 2026 nü Hyderabad nung Maoists telungpur 130-i surrender asüba sülen Telangana Chief Minister, Revanth Reddy-i Maoists telungpurtemi agütsüba prangpong ka amdangba mapang tangokba noksa nung angur. Honibarnü Maoists telungpurtemi prangpong 124 den injang 5,200 ketdangsertem nem bendanga agütsüogo.

West Asia nung rara ajanga rongsenketzüng kongshitsü: Rajnath Singh

New Delhi/Kolkata, March 07 (Agencies): Defence Minister Rajnath Singh-i, tang West Asia nung rara adoka aliba ajanga alima rongsenketzüng aser shishilembaba jenjang mejungi kongshitsüa akok, ta metetdaksü. Kolkata nung Sagar Sankalp sentong nung jembidang Singh-i, "Tang alima tensa ya metetzütetsüa ka kümogo. Iba rara ajanga alima tensa melenshiba sayur," ta ashi. "Tejen tangatbatem, tejen tensatem aser tejen teratbatem kanga kera melenshir. Iba ama metetzütetba tensa ya asenoki angatetsü nüngdak. Tang West Asia tensa ya tongti tatishitsüka lir. Tang yangji tatalokbatem ya khenyongi balaka. West Asia aser asenok aliba region indang tarutsü dak sendakba jembitsüji kanga tasak," ta pai ashi. Strait of Hormuz ya energy security atema kanga tongtibang tesem ka lir; kechiyong iba tesem ajanga alima nung totzü shilem 20 supply asür, anungji West Asia nung rara ajanga totzü aser gas supply mejungi kongshitsü, ta pai ashi. Tang rara adokba nung

ajemdaker Iran-i khu/shiti abenba rong senzüba tongti lenmang 'Strait of Hormuz' shibangogo. Singh-i, "Energy sector nung supply chain raksaba dang masü saka tanü asenoki tanga sectors-a jenjang mejungi akümba kuli angur. Iba ama metetzütetba tensa ajanga alima rongsenkettzüng aser shishilembaba kongshir," ta ashi. "Tang iba tensa ajanga molutzü (oceans) ya kanga tongtibang, ta asenok nem nenshia metetdaksür. Alima yimtenren tetoktepba tsütsü molutzü ya kanga tongtibang kümogo," ta Defence Minister-isa metetdaksü. "Tang ama alima yimtenren melenshiba putu ka nung alima nung tashi liromedemtsü atema molutzü ya kanga tongtibang kümogo. Iba ama tensa mapang ka nung tzüyim tulu aliba linük ka ama India-i mangdang tejangja yur lenitsüla," ta paisa metetdaksü. "Tang ama metetzütetba tensa mapang ka nung taküm alitsü aser renema alitsü lenmangji 'tangar dak memetaloki alitsüla'" ta paisa shisem.



March 07, 2026 nü Patna nung Bihar Chief Minister Nitish Kumar, JD(U) National Working President Sanjay Jha aser Rashtriya Lok Morcha (RLM) tongti, Upendra Kushwaha nung senden ka nung adenba sülen tangokba noksa nung angur.

IRIS Dena amakba dak sendakba nung Jaishankar-i telangzüba agütsü

New Delhi, March 07 (Agencies): Indian Ocean nung US Navy temi Iran nung raraba rong IRIS Dena amakba dak sendakba nung Honibarnü external affairs minister, S Jaishankar-i, Iran nung rong ka India tzüyimkümlen anena ayutsü atema parnokki temelaba asüngdanga liasü aser ano tanga rong ka- IRIS Dena, Sri Lanka anasa liasü, ta metetdaksü. New Delhi nung Raisina Dialogue 2026 nung jembidang Jaishankar-i, "Ni-a UNCLOS (UN Convention on the Law of Sea) aser International ozüng pusemer. Iran-i parnok indang rong ka asen tzüyimkümlen anena ayutsü asüngdanga liasü. Parnoki timtem ajangshidar ta ashi, anungji March 1 nü onoki, 'nenoki arua rongji anena ayutsü akok' ta ashiba sülen anogo ishika tsüngda rongji arua Kochi nung anena ayu. Rong nungji lanur cadets aika liasü," ta metetdaksü. External affairs minister-isa, "Ano tanga rong anata liasü. Parnok apusodang aser ya atongba mapang na tsüngda

tensaji khenyongi balala liasü. Parnok rong asadangtsü atema aru aser tia maka tatalokba kar liasü. Anungji timtem ajangshia yangi rong anentsü asüngdanga ama asenoki melabaji temeim mapa dang lir. Tanga rongtem jagia Sri Lanka nung kasa tensa ajangshi, aser tia makai kati timtem ajuru," ta metetdaksü. Iran nung raraba rongtemji taoba ita India-i Visakhapatnam nung ayongzüka MILAN-2026 exercise nung shilem agia liasü. IRIS Dena rongji International tzüyim nung lia Bodhbarnü US Navy rong nungi khaloktsüba 'torpedo' kati khashia liasü, iba sülen tzü telung nung meküpok. Indian Ocean nung Iran nung rong maaddaksüba atema opposition party temi sorkar aitsür. February 28 nü United States-i Iran anema tenzüka Operation Epic Fury kübok US Navy temi IRIS Dena rongji amak. Iba rong amakba tatalokba nung rong nung mena alir nisung 80 asü aser Sri Lankan Navy temi nisung 32 kümzüka liasü.



TIR YIMYIM YIMOBILEM (EDITRIAL)

DIMAPUR SUNDAY, FEBRUARY (METSUREMI) 08, 2026

Mapa tasak shimtetba

Israel nungertem Ijip lima nungibo pila saka ano parnok nem Tsüngremi agütsüba Kannan limabo metongtet ta senzüba mapang, kenü anogo Tsüngremi Mosa dang Israel nunger nem Pai agütsüba Kannan lima ladangtsü asoshi tebu kidong shia nungi tanishir kaka yoktsü ashi aser Kibubai melaba ama Mosai parnok kin ter ana nungi tanishir kaka Kannan lima ladangtsü yok ta Züngdangba tapu 13 nung shia angur. Item tanishir 12 rongnung Tsüngremi temulung lemtetsüsa Pa dak amangba tasü tait aser temulung tulu adenba tanishir nisung ana liasü. Tena tenüngji ka Yihuda kidong nungi shimtetba Kaleb aser ka Efraim kidong nungi shimtetba Hoshea, shiba tenüng Mosai Yihusua ta melentsü. Item Israel nunger tanishir ter anaji Kannan lima lenden aser tenem ajunga anogo lir nü ladanga senzür külen parnoki anguba osangji Mosa, Aron aser Israel nübertem dangi bener aru. Ajisüaka, parnok itdangiterem 12 rongnung nisung ter-i bener aruba osang agi Israel nungertem tasü peletdaksü. Itdangiter ter jagi Mosa dang ashi, atangji, Kannan limaji mamatzü aser ninang mojitsü ayimba lima ka lir, ajisüaka yangji alirtemji asenok dang nungi tashi taitba, aso kanga tulu aser parnok yimtijji atsübanga lir, anungji asenoki item nisungtemji makoktsü. Ashiko, iba osangji angashir Mosa aser Aron na dena tasü mait kümadoker alitsüa akok, Ajisüaka, idangji Kaleb-i ashi, "asenoki kenyongi tudi aser aji agidi, kechiyong asenoki aji kokteta lir." Israel nunger ajak tasü peleter Egypt limai meyiptsü lia Kaleb-i iba ama tasü tait o ashiba agi, Yihusua dena tasü itshir, tenapronglai pei tula süoshi shisaa endoker, Israel nungertem dang Kannan nung aliba aso tulu nisungtemji metsübutsüla kechiyong iba lima nung alirtemji Tsüngremi parnok nem agütsüogo ta ayimoktsü. Iba mapang nung Israel nungertemi tena long agi onseta endoktsüba tensa tia ka nungi Tsüngrem sayatenya agi Kaleb aser Yihusua na dang masü saka Israel nunger ajak kümzükba asenoki Züngdangba tapu 14 nung tejangja angur. Iba anogo nung jagi tenzüker, Mosa leniba kübok Kaleb aser Yihusua nungertemi anir tasü aser tashi itshir Tsüngremi parnok nem agütsüba Kannan limaji maktetsü asoshi apuso. Aji oda, Mosa melen Yihusua leniba nung Kannan limaji maktetyonga aodang, joko Israel kidong shia nem Tsüngremi melaba ama alinük madak senmang amangtsü asoshi lemsaa agütsütsü tenzük. Israel kidong ter ana rongnung Manase kin tesarang ka nem aser Reuben aser Gad kin na nembo parnok senmangtsü ali lemzüktsür külen, kenü anogo tanüngba kin 9 ser tesarang atema ali alemtsü asoshi kin ajak senteper ain tokdangtsü lia, Gilgal nung Yihuda chirtem Yihusua anasai aru aser parnok rongnung tanishir Kalebi Yihusua dang, parnok nembo küm 45 jakdang parnok külemi Kannan lima ladangtsü asoshi Mosai yokdang parnok tsüng ajemokba li, kong aso tulu aser tashi tait nisungtem liasü aser koba yimitem long agi atsüngbanga liasü, item tsükchir tesashi aliba tesem Hebron tenemjiang agüjang aser yangji aliba tsükchirtemji pai aridoktsü ta mepishia meshi, anungji Yihusuai Kaleb nem pai meshiba ama Israel nungertemi kanga tsübuba tsükchir alidak Hebron tenemji agütsü. Tsüngremi Yihusua ajanga Israel kin shia nem ali senmang lemtsüdang, parnok kin shiai tenemleni masü mesüra nisung tamajunger alidak masü saka tsükchir malidak lendenlen dang aginüa bilemer alitsü. Ajisüaka, Kalebibo tsükchir alidak tenemleni dang meshi, kechiyong Pai Tsüngrem dak temulung alem. Tanü asenoki aiben mapa temelaba apia inyaker mesüra mapa meinyak, animebelem ser jangratema alitsüba tesem bushir. Ajisüaka, asenoki teti anisüngzüka alitsü asoshi dang Tsüngrem dang shira, asenoki Tsüngrem leniba tashi aser sayatenya taochiji majangshitsü aser mangutsü. Tsüngremi Israel nunger nem mamatsü aser ninang mojitsü ayimba Kannan lima agütsü saka iba lima nungji alitsü atema parnok jakdang tongpang aika liasü. Adianutem, Tsüngrem tashi aser taochi ya kanga tulu saka nai nü taküm nung timtem aser anibelem maginüra, nai Tsüngrem tashi asangsang nung memetetsü aser Pa sentsüwangshi nung pelaba tepelaji memetetsü.

OLEMSABANG

LIRLAMALI - MOABAMELIAKALIR

~ Temjenmomgla

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Tiakaba, shiba aonung yim anuksang liasu, yim kishi shibangi aoba mapang, mokozü tulu ka adokya ngur sung kong atem.

Aser aji angashir, yim nung alir ajak atenshi saka oda mi meremsebtet. Aser alu nung alir tem shirnok angashir arur, parnok adong dangbu oda meitsü kuma rongdoker liasu.

Aser yimertem ajak sungkum shibanger asumong among. Otsüla asubaji tatenshika akum. Aser mi koda adok aji aki parnok makakshimaka shisadang.

Anogo ter nu shi ka suyir, oda, Moaba kenu anungdang ka, yimer ajak nem pa angazukba oset tajung, yimer den lemsateptsü aru dang yimer tem ajak senteper angu dang sungmang. Saka, oda ya pai bener aruba oset aser shisatsü lemsateptsü pelaseta aru. Pai mapang meyindoki, oda ajak nem bottle-ji ka ka lemsa-a agutsü aser koda amshitsü aser koma yanglutsü aji-a sayu. Idem ajakji inyakdangbo oda nikongdang akum.

Manga akum nung pa kidangi aotsu meyip dang, yimer temia bilemteta pa dang, iba temelung raksutsüsa osangji ashi aser ba oda soshi ajak shisa ajeb. Ano oda ki den kulemi rongseta asu ta, shir pai pener arutsüba bottle kechi joko half ka rongsar tanak kumer liasu aji ngur, ba kokoa ajeb (wept bitterly).

Saka oda tebur asu nung tanunu bu kecha masu ama, ki asu, aser aonung iba ya koda amshitsu aser koda yanglutsü aji sayua, pa sa tepelaba ama ali.

Oda joko sungjang adang ba mapang ka nung, pa mangsa senzüa, ashi,

"Otsü, otsü, ni junga lir, na kong lir.

"Otsü, otsü, ni junga lir, saka ni ayar.

Otsü, otsü, ni junga lir, ni tarur.

Otsü, otsü, ni junga lir, na kong lir.

Otsü, otsü, ni junga lir, saka ni ayar.

Otsü, otsü, ni junga lir, na kechi nung lir."

Ta shia oda yim leman nung senzü, aser shinga dena mejembe, aya dang oda ali nung indoka aliba mashir mashi ajak shia chia liasu aser ken kenbo sung ben-tzü tai ao, aya, temeimtsüka inyaka takumji ali.

Anungji yimer temi arasener dangi anir ao, aser maneni teyari balala ajanga yaritsü merang, saka pa taneptsü mangu, oda pa takum ali tashi manepi akum.

Aser oda temulung ayang aka yaritsübaji menuoadoker asu. Oda menungraseta yimer temi ken ya denloktsü;

Aya, aya, Moaba, yim atena oaka yim nung shilang.

Aya, aya, Moaba, yim sangwa daktsür

Aya, Aya, Moaba shilanga lir, saka tanu ba mali.

Aya oda Moaba takum raksaoko ni..

Otsu Lirla, ajiang, Moaba yangi liaka mali..

Aya, aya, sangwadaktsür Moaba akumli nung joko mali.

Saka, Otsüla Lirla-er yimertemi, Moabai, sayuba mapa tajung ajanga yimertem tenük sakdaksü. Anungji, oda tanu tashi tsurabur-i joko lokti tentet ajak nung atentsü, pei tebilemba lemsateptsü, ano maneni yimjung nung kati ka ajunshiteba tangazuker kaka asutsü, aser mapa meranga inyaktsü, tsürabur tashi anga ajemalu-a alitsü ajungshi.

Oda, Moaba mapa tajung ajanga yim tejakleni aoba medem, tanu-a asen takum nung angazüknüba tejangra nung mapa ajak inyaka alitsüba merangti.

Note: Iba otsü ya yimdangjem otsü, tatishitsü lia zulubayong, kardanga masuba zulua lira tai adoktsü mepeshir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Ukraine nung Baptist Arogo Tenla ki 450 raksatsüogo



March 07, 2026: Parachurch ministry Mission Eurasia-i, 2022 küm February ita nung Russia-i Ukraine amak tenzükba sülen nungi tang tashi nung Russia sepaitemi tekülem ki 737 raksatsüogo, aser item rongnung Baptist Arogo Tenla lir 450 densema lir, ta metetdaksü. Ukraine nung Russia sepaitemi metetsümonga Baptists Arogotem anema inyaker, ta kasa osang ajangasa metetdaksü. Ukraine nung aliba Baptist Arogo ka nung pastor Sergey Ivanov bo Russia sepaitemi apuba sülen tang tashi mechioker. Pastor Ivanov-i Ukraine ketdangsertem den amalitepa inyaker ta pa nem tai tongloksüba den külemi pai

Russia nunger kübok par Arogo register asütsü memelunger, ta aitsü. Iba Arogo nung züngsemtemi, Russia sepaitemi mapang shia tekülem sentong tagidak mapang nung timtem agüja aru aser tesüsabo Tenla ki shibangtsüogo, ta metetdaksü. Osangbenertem den jembidang Ukrainian Baptist Union nungi Igor Bandura-i, "Russia nunger sepaitemi ajak raksatsür. Tenla kitem dang masü saka yimtsüngtem, jilatem aser yimtitem raksatsür. Ajaki toktsür jenshir," ta metetdaksü. Russia nungertem Ukraine nung Orthodox Arogo anema-a inyaker. Ukraine nung rara tenzükba mapang nungi Russian Orthodox Arogoi Ukrainian

Orthodox Arogo azüoktsü meranger, aser ibaji ajanga denomination aikati Ukraine nung aliba Orthodox Church toktsüogo. Crimea nunga Russia ketdangsertem Orthodox Church of Ukraine nung putir, Serhii Mykhalchuk mapang shia amokmerener, ta osang ka ajanga metetdaksü. Russia sepaitemi Orthodox Arogo aika mita aoer aser putirtem mezüngmeshir. Tatalokba ka nungbo Orthodox putir ka süoshi ajak semzükdaksür azükba yimdong süa anir jaja. Ukraine nung rara tenzükba sülen kümtem süia arudang Arogotem timtem taliba ajangshir, aser rara manenra ano tensa tamajungba dang akümtsü.

ANOGO ABEN TSÜNGREM DEN

AJAK YANGLUSANG, AJAK MADAK TAKOKSANGJI TSÜNGREM

Tetenzük nung o liasü, aser o Tsüngrem den liasü, aser oji Tsüngrem liasü... Kechisarena pa ajanga adok, aser kechisa yangluogo, pa medeni kecha meyanglu.

~ Yohan 1:1-3.

Tanü asen lokti nung asen lima teraksa indang tulu tila ajaki kanga sashia jembir. Kechiba yamai sashia jembir ta süra, ajaki pei lima meimer. Ajaki pei nübur meimer. Aser, tejakleni onüba agi jembir ta angateter. Süra koda yanglu nung ajungtsü?

Telangzübaji bushidangra, Yohani züluba Tsüngrem o nung yamai shia angutsü. Tetenzük nung o liasü, aser o Tsüngrem den liasü, aser oji Tsüngrem liasü... Kechisarena pa ajanga adok, aser kechisa yangluogo, pa medeni kecha meyanglu. Yohan 1:1-3. Aser oji shi aküm aser taochi aser ochi agi sünga asenok rongnung ali. (Khrista) Yohan 1:14. Iba o ajanga alima ajak yanglu süra, iba ajanga asen lima yanglutsü makoktsü na?

Jembiba amaji asen lima meimer ajaki iba Tsüngrem o nung amendaker, kija, kibong, aser lokti ajakji yanglura, tobur junga yanglutetsü. Tsüngremer senso tajung ka ama, ajaki shilem tajung agia iba ochi o ajanga asen lima yangludi. Tsüngremji ochi, ochiji Tsüngrem. Tetenzük aser tatembang maka, ajak yanglusang, ajak madak takoksangji Pa lir.

SARASADEM:

Ajak yanglusang, ajak madak takoksangji Na lir. Özü lima tobur junga yanglutsü, Ne o nung, onok takar kümdakjang. Amen.

Chhattisgarh nung tribal Khristan ka tasü mang meremdaksü

March 07, 2026: Chhattisgarh state nung arrshi küm 34 tribal Khristan tetsür ka tasü mang aremtsü atema lar kibong nem temelaba magütsü. Sambai Mandavi tangu sashiba dak sendakba tashidak aser temelungjang dak sendakba tashidak agi shiranga aruba sülen February 24 nü asü, ajisüaka Kanker district kübok Amodi yimdak yimdaklirtemi la tasü mang aremtsü atema temelaba magütsü. Yimdak Khristan yimya nung asüpila sentong agiba ajanga litsü aser tsüngremtem jashidaktsütsü, ta shia tasü mang aremtsü memela. La tasü mangji tang tashi hospital nung tasü mang ayudak yua lir. Yimdaklirtem jagi Khristan kibong dangji, nenoki Hindu yimsü dangi meyip nung ang tasü mang aremtsü atema temelaba

agütsütsü ta ashi. Iba sülen Sambai kinüngbui sorkar ketdangsertem nem tashishiba ken o agütsüogo. February 18 nü Supreme Court-i, Chhattisgarh state nung joko Khristantem t a s ü m a n g merongdokdaksütsü, ta tetuyuba agüja lir. C h h a t t i s g a r h Association for Justice & Equality-i Supreme Court dang, tasü mang aremtsü atema tribal Khristantem nem temelaba magütsür, ta shia ken o benoka lir. United Christian Forum (UCF)-i ashiba agi, yaküm küm kija nunga Chhattisgarh, Odisha aser Jharkhand nung tribal nütsüng aliba tesemtem nung Khristantem tasü mang m e r e m d a k t s ü b a tatalokba 23 liasü, ibayongji tasü mang aika rongdoktsüsa aküm mesüra yimdak nungi meta talangka pilar ang aremtsüsa aküm.

C h h a t t i s g a r h Association for Justice & Equality-i Supreme Court dang, yimtsüngtem nung tanga yimsü amangertem tasü mang remdaksür, saka Khristantem tasü mang aremtsü atemabo temelaba magütsür; linük temzüng kübok senso ajak nem kasa temeden agüja lir saka Khristantembo bendanga züngshir, ta metetdaksü. Progressive Christian Alliance nungi Rev. Dr Akhilesh Edgar-i, yimtsüngtem nung Khristantem tasü mang aremtsü memelaba ya tanaben Hindu yimsü dangi meyipdaksütsü atema Khristantem rongshitsü atema lir, ta metetdaksü. Paisa, tasü mang aremtsü temeden dak sendakba nung ozüng tejangja yanglushitsü nüngdaker, iba denji külemi Khristan k i b o n g t e m amokmerenertem nem temerenshi agütsütsüla, ta takhangba agütsü.

BGEA-i Mexico anasa Gulf Coast nung 'Celebration of Hope' ayonger

March 07, 2026: Billy Graham Evangelistic Association (BGEA)-i Mexico anasa Gulf Coast (US) nung evangelistic outreach sentong tuluka ayongzuka agitsü atema renemdar.

Yisu Khrista osangtajung lemsateptsü atema BGEA-i local Arogo 145 den senteper "Gulf Coast Celebration of Hope" ayongzükür.

March 21-22 anogotem nung Gulf Coast Coliseum aser Convention Center na nung ayongzükba sentong ana nungji nüngtugu sayutsüngir, asür Billy Graham'er semchir, Will Graham-i Khrista dak nungi anguba teimla aser temeim lemsateptsü; Yisu Khrista ajanga tekümtet anguba osang pai lemsateptsü.

Will Graham-i, "Tang alima tesem balala nung nisungtemi Gulf Coast atema sarasademtsüdar. Iba ama tongtiband region ka nung Khrista osangtajung lemsateptsü atema khuret lir. Ni Laishiba nung shia aliba lemsateptsü aser asen Kümtetdakba Yisu Khrista tuyutsü. Asenoki tatem maka teimla Pa dak nungi angutsü atema Pai Pa taküm bendanga agütsü aser Pai leper madak takok angu," ta metetdaksü.



Will Graham

Gulf Coast Celebration of Hope ji March 21 aonung 7:00 ako nung tenzüktsü. Iba sentong nung DOE aser Charity Gayle nungeri ken ajanga shilem agitsü. March 22 nü sentongji aonung 6:00 ako nung tenzüktsü aser iba sentong nung Terrian aser Charity Gayle nati ken ajanga shilem agitsü. Sentong anaprongla nungi Will Graham-i Tsüngrem O jembitsü.

Gulfport nung aliba Grace Truth Baptist Church nungi Rev. Rossie L. Francis-i, "Gulf Coast Celebration of Hope nung Khrista osangtajung lemsateptsü atema tang mapang ya mapang tetemsü," ta metetdaksü.

Rev. Rossie L Francis-isa, "Onoki takümtem aser kibongtem aika nung temelenshi tulu adokba angutsü. Tsüngrem temeim lemsateptsü atema onok asoshi maongka kishi lapoktsüogo," ta metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Wa

(interj) ojangaji ta aoksa bilema adokba ola (exclamation of shocking regretfully)

* Wa ! asenoki makokana ?

Wabang

(v) akhümbang, amokbang (give shelter, cover with hands as protection)

* Tsüngrem teka agi asenok wabanger anüker.

OLONG PAITEP # 7436

Grid for OLONG PAITEP # 7436 with numbers 1-15 in various cells.

TIPLIN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsü mapang süiadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. ____i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. ____ kibur - (5)
13. Tebur tembar tsüngda jatepba - (4)

OLONG PAITEP # 7435 TELANGZÜBA


TIPLIN :

- 1. Meyi, 6. Shin, 7. Yimkong,
9. Tera, 11. Teberem, 12. Anem,
15. Senmang, 17. Tenü, 18. Anep.

LANGTSÜNGLEN :

- 2. Yim, 3. Tanü, 4. Shilem, 5. Ano,
7. Yakta, 8. Kilem, 9. Tenem,
10. Amang, 11. Tenüng,
13. Mela, 14. Ita, 16. Ain.

NAI-A YA METETTER



Indian academic achiever Dr. Anil Kumar Yadav-i maneni Limca Book of Records 2026 edition nung tenüng züluoktsüsa inyaktetogo.

Yadav-i "Post Graduate Qualifications from Most Number of Universities" naroküm atema 2016, 2020-22, 2023, 2024, 2025 aser 2026 Limca Book of Records editions nung züluokogo.

February 2026 tashi nung Yadav-i academic qualifications 239 buba ngutetogo. Pai States aser Union Territories 20 nung universities 28 nungi university qualifications 60, Indian Institute of Banking & Finance (IIBF) nungi banking qualifications 67, UGC-NET certificates 13, Coursera certificates 65 aser miscellaneous certifications 34 tashi ngua Academic Qualifications ajak agi 239 nguteta lir.

Tangkhul Naga tsürtemi prangpong-injang apu



Imphal, March 7, 2026

(Agencies): Manipur kübok Ukhrul district nung Naga tsürtemi tasütait mapatem inyaka arur aser tan-a NH-202 nung parnoki mita aodang prangpong-injangtem bena aliba puogo.

Tangkhul Naga tetsür volunteers-i Shangshak nung local patrol alidang gari ka nung Single Barrel Breech-Loading (SBBL) gun ka, muzzle-loading

firearm ka aser injangtem bena aliba apu.

Parnoki asüngdangya asüdang nisung kati Ukhrul district nungi Kangpokpi district kübok Saikul-i prangpong-injang bener aoba nangzüka liasü.

February 24 nü Tangkhul Naga Long (TNL) nung Working Committee-i Tangkhul Naga yimdaklir ajaki Kuki nung den tesentaktep pilatsü tetuyuba agütsüba sülen iba ya

atalokogo.

Tangkhul aser Kuki nung tsüngda mepetmesü adoka raradang kiojen 50 shi raksatsüba sülen iba tetuyuba ya agütsü.

Tensa kanga mejungi akümba agi volunteers-i prangpong-injangtem apu aser bangdakpur ket nung agütsüogo. Ajisüaka parnoki gari nung mener arurtembo yok.

Meghalaya CM-i police 3,000 jungnüa nem appointment letters agütsü

Shillong, March 7, 2026

(Agencies): Meghalaya Chief Minister Conrad K. Sangma-i Meghalaya Police nung nisung 3,000 jungnüa nem appointment letters lema agütsüogo.

Iba ya Meghalaya nung law enforcement aser governance akangshiba nung tongti mera ka lir ta pai ashi.

Conrad Sangma-i Tura nung nung sentong ka nung jembidang "iba ya state putiotsü nung recruitment drives tulutiba rongnung ka lir" ta ashi.

"Sorkari iba recruitment ya kanga nüma tanga bilemer aser transparent & merit-based nung

iba mapa inyakogo" ta Conrad-i ashi.

Iba recruitment drive nung 1.7 lakh candidates liasü aser parnok rongnungi 3,000 candidates jungnüa shimteta appointment letters agütsüogo ta pai metetdaksü.

Meghalaya Police nung technical aser service-oriented positions tazüng 2,968 atema nisungtem shimok ta ketdangtsürtemi ashi.

Parnok ya Armed Branch Constables 1,494, Unarmed Branch Constables 720, Multipurpose Response Operators 205 aser firemen 195

lir. Mapatem rongnung UBSP, Driver Fireman, Driver Constable, operator aser mechanic dena lir ta ketdangtsürtemisa metetdaksü.

"Law and order melii terenlok mapa meinyaktetsü. Yimjung aser tensa süngjema melira maparen tejaklen inyaka moutetsü" ta Conrad-i ashi.

Meghalaya state sorkar küm 8 abensatsü aser iba mapang tsüngda appointments aser recruitments 11,000 jungnüa süogo ta paisa metetdaksü.

Meghalaya Director General of Police Idashisha Nongrang-i tasentem pelashishia agizük.

Pramod Boro-i Rajya Sabha menden takok nguogo



Guwahati, March 7, 2026

(Agencies): United People's Party Liberal (UPPL) President Pramod Boro den tetokteper shinga melii Rajya Sabha election nung takok nguogo.

Iba ajanga Bodo nung asoshi alizüng tulu ka tongtetogo. Assam nung Rajya Sabha menden asem atema nomination papers agütsüba rebrandang pai takok anguba jangjaogo.


Boro indang nomination ya United People's Party Liberal, Asom Gana Parishad, aser All India United Democratic Front nungi MLA temi pusema nungit aser pa atema nungdakba proposers den teimba MLA tem liasü.

Iba ya Bodo nung atema otsüsütsü mapang ka lir. Parliament nung Bodo nung ka Rajya Sabha züngsem kümdaktsütsü nükjidong

tongtipangbaji 125th Constitutional Amendment Bill of India jembitsü atema lir. Iba ajanga Bodoland Territorial Council nung tang menden 40 aliba nungi 60 akümtsü ashir.

Iba osang angashiba sülen nisung aikati Kokrajhar nung Boro pelashishia agizük. Parnoki yartsüngsangtepa, firecrackers poktepa aser naro enokjang pa pelaa agizük.

Iran-i kidanger linüktem amakba anena atatsü: Pezeshkian



Iran tir Masoud Pezeshkian

Tehran, Metsüremi/March 7 (Agencies): Iran tir Masoud Pezeshkian-i kidanger linüktem nungi parnok memakra item linüktem joko ojang dang amaktsü ta ashi.

United States aser Israel nati Iran amakba sülen Iran-ia meyiper Gulf nung linük balala amak tenzükba joko hopta anabuba ajungba mapang Pezeshkian-i iba olen lemsatepogo.

Iran tir Masoud Pezeshkian-i, kidanger linüktem joko ojang dang amaktsü, ta shiogo.

Iran nung interim lenirtemi iba bangzüng ya Hokolbarnü agizüka liasü, ta Pezeshkian-i Honibarnü metetdaksü.

Iran nung media sangdong balala ajanga ashiba agi, anogo ishika tsüngda parnoki kidanger linüktem nung tamendakdak balala amakba atema tiri tatok meshiogo.

Al Jazeera osangbener Tohid Asadi-i Tehran nungi sangdong ka ajanga ashiba agi, "US aser Israel nati Iran amaka tenzükba anogo tibuba ajungba mapang Iran tir-i iba olen lemsatepba ya tilaka dang süka iba ajanga mepetmesü tajemba küm daksütsü. Anüing ajanga yimti 170 dak tema maneni amakba onoki osang angazükogo."

Pezeshkian indang osang ya jelia mangaokba osang ka koba minute pongu shi liasü. "Pai nisung aliba tesemtem, school aser mozükitem amakba indang jembia tenzük, koba international temzüng ozüing anema lir ta ashi. Paisa, linük sovereignty kümzüka ayutsü atema nüburttem longjemtsü ayongzüka liasü. Pai, America nung dangi osang tesashi ka yokogo aser ashiba agi, US parnok bendanga agütsüdaksüner saka parnoki

parnok nükjidongtem leperi bener aitsü ta ashi," ta Asadi-i ashi.

Gulf Cooperation Council (GCC) linük Saudi Arabia, Qatar, United Arab Emirates, Kuwait, Bahrain aser Oman nung US indang assets balala amenoker aliba ajanga Iran-i item linüktem ajak makogo. Iraq, Jordan, Azerbaijan aser Turkiye nungera iba rara nung teyongtsü nung mejepegogo.

Gulf nung tasüba aser teraksatsüba tulu adokogo aser tayimtsütem senzusenpong nunga minprong aika adokogo aser iba ajanga linük balala indang airspace shibanga ayutsüsa aküm aser iba den ano alima ajunga nung totzü aser gas production nung tetsük daksü adoka liasü.

Ajisüaka Qatar-i ashiba agi, Iran tir Pezeshkian indang osang ya Iran nung media balala ajanga sangdongba sülen minute ishika dang lir missile ka agi parnok maka liasü.

Pa indang osang ya Iranian Revolutionary Guards Corps (IRGC) indang tashi agi amokbangogo, ta Al Jazeera osangbener Resul Serdar-i ashi.

"Iran nung yimden yimsüsürtem ya state inyakyimtem achaayangtsü asoshi lir aser parnoki 'non-strategic' affairs tem achaayang masür. Ajisüaka linük foreign aser security policy amala strategic affairs dak sendakba nungbo tir densema yimden yimsüsürtem dak tashi mali. Tir ya Iran nung tanabuba jenjang nungang lir ta ajaki jangja jangja meteta lir," ta Serdar-i ashi.

Iran nung yimjung mapang nunga tashi ya ajak Supreme Leader aser Iranian Revolutionary Guards Corps ket nung lir.

Linük tang taküm tasüna nung aliba mapang Pezeshkian dak linük balala amaktsüba mamaktsüba nokdangtsü asoshi kecha tashi mali aser kidanger linüktem dangi osang yokba ya kecha jenjang maket, ta Resul-isa shisem.

"IRGC ket nung tashi ajak lir aser linük ka amaktsü mamaktsüji parnoki telemetba agitsü," ta Resul-i ashiba dem IRGC tekolakba Ahmad Vahidi ya iba telok tentetba mapang nungi ajak dang nungi commander tamajungtiba rongnung ka ta züngshir, ta shisem.

"Security politics dak sendakba nung Pezeshkian mesüra tanga yimden yimsüsürtemi tashitsü kecha malitsü ta bilemer," ta paisa shisem.

Kasa mapang nung Qatar indang Energy Minister Saad al-Kaabi-i ashiba agi, Iran den rara maneni ora Gulf nungi export tem ajak iba hopta anenatoktsü akok, aser iba ajanga alima ajunga nung energy market nung mepetmesü tulu adoktsü.

Al-Kaabi-i Financial Times (FT) osang kaket den interview ka agiba mapang ashiba agi, iba rara ya hopta ishika rarayonga ora alima ajunga nung GDP renloka aoba dak kongshitsü.

"Ajak indang energy jenjang timba akümtsü. Oset kar agibo kanga anüngtsü aser supply mesütetba factory tem chain reaction ka adoktsü," ta al-Kaabi-i ashi.

Iba rara nung Iran-i tesem balala amakba mapang Kuwait nung US command centre ka nung dang US nung trok tepsetogo.

Kasa mapang nung US aser Israel nati rara tenzükba mezüngbuba hopta Iran nung 1,200 dak tema tepsetogo.

ALI
TAYOKTSÜ
LIR

AT KHEKHOKHU VILLAGE
NEAR NAGALAND BAPTIST COLLEGE
REASONABLE PRICE - NO BROKER
CONTACT : 9612633017 / 9366303994

Israel-i Lebanon amaktsü atema sepaitem yok; nisung 16 tepset

Beirut, Metsüremi/March 7 (Agencies): Israel indang military-i tayimtsü amshia operation ka benoka inyaka, manger mesangwa tsüngda Lebanon anütoklen jila ka amatsü atema sepaitem yoka liasü, ta iba tesem nung alirtem aser Lebanese state media-i Honibarnü metetdaksü.

Israel-i iba tesem anüing ajanga maneni maka nisung ter dak tema tepsetba mapang ka nung sepaitem ya yoka liasü.

Iran-i teyari agütsüba Hezbollah teloki rocket aser drone amshia Israel amak tenzükba sülen Israel-ia meyiper Lebanon anütoklen, anüotiplen aser linük yimtiba Beirut anasa tesemtem amak tenzükba Lebanon-a Middle East nung mepetmsü nung densemdaksüogo.

Manger mesangwa tsüngda Israel nung indang helicopter temi Lebanon anütoklen Bekaa Valley nung Nabi Chit jila anasa sepatem tsükdakja liasü, ta Lebanese state media aser iba tesem nung alirtemi ashi. Iba tesem nung alirtem aser Hezbollah teloki item sepaitem dak injang khaloktsü.

Israel-i Nabi Chit aser temeket nung aliba jilatem maneni amakba mapang Israel nung sepaitem ya atsüing aser helicopter nung mener oatok, ta state media aser iba tesem nung alirtemi ashi. Iba tatalokba dak sendakba nung Israel military-i kecha telangzüba magütsü.

Lebanon indang health ministry-i ashiba agi, taoba

ghonda 24 tsüngda Israel-i Nabi Chit jila amakba mapang nisung 16 tepsetogo. Otongdar kati Reuters dang ashiba agi, asürtem ya Hokolbarnü tepsetba aser anonung sangwa-a bomb pokloksüba mapang tepsetba lir aser asür timba akümtsü imlar.

Security sources anati Reuters dang ashiba agi asürtem rongnung army asem densema lir.

Israel-i Lebanon amak tenzükba sülen nisung 200 dak tema tepsetogo aser nisung 300,000 shi pei talidak ki toktsür jenshiaogo. Pei ki toktsür jenshia or alirtem ya asemsü nung ka dang sorkar tejenokdak jenoka lir.

Kasa mapang nung Hezbollah-i ashiba agi, parnoki Nabi Chit anasa helicopter pezü nung anir arua toktsüba Israel nung sepaitem dak injang khaloktsüogo. Parnokisa Israel nung sepaitem ya atsüingina liasü, ta ashi.

Israel nung sepaitemi southern Lebanon nung ground operation tem benoka inyakdar, saka airborne operation tem yabo aibenbo benoka minyaker. 2024 küm Israel aser Hezbollah na raratepba mapang Israel navy-i Lebanon nung tzüküm nung aliba jila ka nungi nisung ka pur oa liasü.

United Nations-i Honibarnü ashiba agi, linük ana tsüngda rara tamajungba kuma aotsü aser rara anentsü atema Israel aser Lebanon nati takaratiba nung sensak asemtsüla.

DEFCC nungi ketdangsurtemi ... (TAPAK 2 NUNGLI...)

Sema-isa, inyakyim metongshitsü atema Nagaland sorkari iba ken o ya BSI aser India sorkar den ashishiteptsü ta ashi. Nagaland nung Süngya süngtong lakh 25 bosa alitsü ta Sema-i ashiba den küm ishika tsüngda iba süngtong tsünürtem aika kümogo ta ashi. India sorkari Süngya export quota 80% Assam nem agüja lir ta shia Sema-i, linük nung Assam, Tripura aser Nagaland nung iba süngtong timba tsünüa lir ta ashi.

Union Budget 2026 nung North East nung Süngya tsünütsüba aser shishilembatsü asoshi teyari agütsütsü atema sangdongba ya Nagaland amala state ka asoshi structured aser scientifically guided Agarwood sector amenoktsü asoshi maongka tajung ka ta ashi.

Kadamtala, Tripura aser Golaghat, Assam nung Agarwood processing aser trade hub amenokba angazüka

Kikheto-i ashiba agi, Golaghat nung centre amenokba ajanga Nagaland nung Süngya tsünürtem ajangzüktsü, kechiyong ba centre ya state anasa lir ta ashi.

Maneni RFRI, Jorhat semdangba mapang Y. Kikheta Sema meina Sidramappa Chalkapure, IFS, Chief Conservator of Forests (Development & Planning), Nagaland; Suman WM Sivachar, IFS, Divisional Forest Officer, Wokha; Beizo Soukhrie, IFS, Divisional Forest Officer, Dimapur; Desabathula Rajiv Shankar, IFS, Working Plan Officer, Nagaland; Elithung Odyuo, Assistant Conservator of Forests, Wokha; Imkongsunep Longchar, Assistant Conservator of Forests, Dimapur; aser Kikhavi Choppy, Range Forest Officer, Chumoukedima nung oa liasü.

Jail Committee züngsemtemi District...

(TAPAK 1 NUNGLI...)

Tepuokdak semdangba mapang Member Secretary-i, Superintendent Aonochet Aier, Asstt. Jailor, District Jail, Tuensang Y. Chubasangle Chang nung den sensak asem aser tepuokertem idang asüngdangba den tepuokdak facility, security aser legal aid services tem asadanga liasü.

Pai tepuokdak asadanga aoba mapang CCTV mapa minyakba nguteta security asoshi CCTV amenoktsü benok aser tetsürtem ward nung European toilet amenoktsü aser tetsür ward atemsa kitchen ka yanglutsütsü benoka liasü.

Paisa, tepuokda amshiba mini truck koba raksar lir iba ya

melentsü asoshi jenjang tapet agitsü shiogo.

Ajak senteper Tuensang district jail nung UTPS 13, convicts 4 aser inmate 5 lir. Parnok nem legal teyari agütsüogo aser parnok rongnung ano nisung asem legal teyari nüngdaka aliba ngutetogo.

30buba Naga Traditional Wrestling Championship tenzükogo



30buba Naga Traditional Wrestling Championships cum 1buba Wrestling Festival 2026 sentong nung Chief Minister Dr. Neiphu Rio aser tanga ketdangsürtem tangokba noksa nung angur.

Dimapur, Metsüremi/March 7 (TYO): 30buba Naga Traditional Wrestling Championship den repsema 1buba Wrestling Festival 2026 March 7 nü Kohima Local Ground nung tenzükogo.

Asayamung lapokba sentong nung Chief Minister, Dr. Neiphu Rio alaketa jaoker liasü, shibai Naga Traditional Wrestling ya asen maitsü, senmang aser remseptsütsü makokba Naga nung tanüla benjungba ka lir ta ashi. Paisa, Naga wrestling ya tetsü-tebou mapang nungi belenzüka aluba senmang ka lir ta ashi.

Dr. Rio-i ashiba agi, saisabong ya pei tashi tendangba dang masü saka iba ajanga pei yimyayimbong aser meraket sayur. Paisa, sobaliba, asaya aser arok maitsü ajanga nüburtem longjemdaksüogo ta ashi.

Iba asayamung ayongzükba atema Nagaland Wrestling Association (NWA) nem tenüngsang agütsüba den, Tenyimi nung aliba tesem nung dang masü saka state nung tangalenia iba asaya prokshia aob atema pelaba pai lemsatop.

Maneni Chief Minister-i, saisabong infrastructure

ajungkettsü aser sobaliba asayartem wazüka ayutsü atema state sorkar bendanga agütsür aliba nenshia metetdaksü. Dr. Rio-isa, Chief Minister indang Sports Fund ajanga provisional units trok-Rengma Wrestling Association, Sumi Wrestling Association, Lotha Wrestling Association, Pochury Wrestling Association, Chang Wrestling Association aser Sangtam Wrestling Association nung nem senotsü teyari lakh kaka agüja liasü.

Iba sentong nung CM meina Deputy Chief Ministers, Y Patton and TR Zeliang, Speaker NLA, Sharingain Longkumer, Advisor, MLA aser tanga ketdangsürtem oa liasü.

Sentong nungsa Wrestling Federation of India tir Sanjay Kumar Singh-i tetushi tejaoker ka ama lokti ayongzük aser iba maongka agütsüba atema pelaba lemsatop. Sing-isa, iba asaya nongita yaritsü asoshi equipment balala alitsü atema senotsü teyari agütsütsü sangdonga liasü.

Kasa mapang nung NWA tir Vivolie Kezo-i, sentepa aliba lokti dang asayaba tesem nung dang masü saka iba ya adena ora wrestler tem nongita yaritsü

ayongzük. Paisa takok angurtem nem tetushi agütsüba sentong ya March 9 nü ayongzüka agütsü ta ashi. Wrestling Federation of India-i parnok nem teyari agütsüba atema Kezo-i kanga pelaba lemsatopba den maneni yaritsü mepeshia liasü.

Iba asayamung ya Ministry of Tourism, Government of India aser Department of Tourism, Government of Nagaland na teyari nung Nagaland Wrestling Association-i ayongzükogo. Iba asayamung nung wrestler 54 toktepdar. Asayartem ya Angami Sports Association nungi 18, Chakhesang Wrestling Association nungi 18 aser Zeliang Wrestling Association nungi 18 lir.

Asaya nung champion nem senpet sen 6,00,000 den ali ka agütsütsü koba Tepuleho Pusa'er kinungertemi tenla agütsüogo. Tanabuba aser tasembuba nem senpet sen 3,00,000 aser 2,00,000 agütsütsü aser pezübuba nem sen 1,50,000 agütsütsü.

Taküm iba asayamung nung 1buba NWA Under-15 Championship aser 1buba NWA Provisional Championship-a March 6 nü asayaogo.

England T20 World Cup camp Abu Dhabi nungi belener ogo

Metsüremi/March 7, 2026 (Agencies): England tetsür cricket team T20 World Cup atema renemshiba camp Abu Dhabi nung agütsü aliba sentong melenshiba sülen South Africa-i benelerogo. Middle East nung tang rara adoker aliba ajanga iba jenjang agiogo.

Asayar 30 shi iba camp atema Pretoria nung adenshitsu. Item asayartem ya intra-squad series ka nung asaya pongu atema squads ana (asayar 15) küma lemsar asayatsü. Asayatem ya March 10 nungi 27 tsüngda asayatsü.

Team ana ya taoba England nung asayar Jan Brittin aser Rachael Heyhoe-Flint na tenüng nung jatsüogo, shirnok kidang World Cup akokba team nung densema liasü.

England captain Nat Sciver-Brunt lenisüba nung Team Brittin asayatsü. Iba team

indang coach ji taoba mapang Durham batter aser England tetsür team assistant coach Jon Lewis asütsü. Vice-captain Charlie Dean ya Team Heyhoe-Flint captain asütsü aser assistant coach Luke Williams-i parnok achaayangtsü.

Head coach Charlotte Edwards-i camp mapang squad anaprongla achaayangtsü. Lai ashiba agi, iba asayamung yagi asayartem kidang T20 World Cup masaya tsüngda squad nung adentsü atema jenjang ka asoshi raratsü atema teyari agütsütsü.

"Asayartem ajak asoshi parnok World Cup asayatsü temsüa lir ta sayutsü atema iba ya maongka tajung ka asütsü," ta Edwards-i ashi.

January ita Oman nung tasadak rangloker camp ka agiba sülen tang England team South Africa nung iba camp agütsü lir.

T20 World Cup masaya tsüngda England team New Zealand aser India na den white-ball series ka June 12 nungi July 5 tashi asayatsü. Iba sülen parnok India tetsür team den Lord's nung Test ka asayatsü.

Team Heyhoe-Flint: Em Arlott, Tammy Beaumont, Tilly Corteen-Coleman, Charlie Dean (capt), Sophie Ecclestone, Mahika Gaur, Dani Gibson, Jodi Grewcock, Amy Jones, Heather Knight, Emma Lamb, Grace Potts, Grace Scrivens, Alexa Stonehouse, Danni Wyatt-Hodge.

Team Brittin: Lauren Bell, Maia Bouchier, Alice Capsey, Sophia Dunkley, Lauren Filer, Freya Kemp, Charis Pavely, Davina Perrin, Paige Scholfield, Nat Sciver-Brunt (capt), Linsey Smith, Rhianna Southby, Ellie Threlkeld, Mady Villiers, Issy Wong.

Hockey team WC qualifiers Uruguay den asaya-a tenzüktsü

Metsüremi/March 7, 2026 (Agencies): Taruba FIH Women's Hockey World Cup atema Qualifiers nung India team mezüngbuba asaya Uruguay den Deobarnü coach tasenba Sjoerd Marijne lenisüba nung asayatsü.

Iba asayamung nung team ti asayatsü. Team tem rongnung hosts India, England, Scotland, Korea, Italy, Uruguay, Wales, aser Austria nung densema lir, aser parnok WC atema qualification jenjang asem asoshi tokteptsü.

Iba asayamung nung temaba jenjang nung tembangba team asem World Cup atema qualify asütsü, koba Belgium aser Netherlands nung tebur asayamung den külemi August 14 nungi 30 tashi asayatsü lir.

Head coach mapa abentsü atema tanaben meyipa aruba sülen Marijne lenisüba nung India tetsür team tang mezüngbuba asayamung ka asayatsü lir. 2021 küm Tokyo Olympics nung pezübuba jenjang nung tembangba sülen Marijne-i coach mapa tokja liasü.

India team ya alima nung

jenjang tekububa nung lir aser iba asayamung nung England sülen tanabuba jenjang nung lir.

World rankings dang apitep nungbo India-i Uruguay akoktsü imlar aser kanga mejungika asaya mesüra parnoki asaya akoktsü, ta temulung lema bilemer.

Uruguay den asayaba sülen India team Scotland den March 9 aser Wales den March 11 nü asayatsü.

Deobarnü ano England aser Italy na, Korea aser Australia na aser Scotland o Wales na asayatsü.

Qualifiers ya pool ana küma lemsar asayatsü. Pool A nung England, Korea, Italy, Austria aser Pool B nung India, Scotland, Uruguay, aser Wales alitsü.

Pool anaprongla nungi temaba jenjang nung tembangba team anana semifinal-i aitsü. Semifinal akokba team ana aser bronze medal anguba team World Cup atema qualify asütsü.

Taruba World Cup nung tetsür team 16 aser tebur team 16 asayatsü aser category anaprongla nung team tekukubo qualify süatokogo.

Indian Wells: Osaka, Sabalenka, Zverev, Mboko nungeri takok nguogo



Naomi Osaka

Metsüremi/March 7, 2026 (Agencies): Tang asaya aliba Indian Wells asayamung nung Honibarnü tetsür kija asaya nung Japan tsür Naomi Osaka-i Victoria Jimenez Kasintseva kokogo.

Iba asaya nung Osaka-i 7-5, 6-2 agi Kasintseva madak takok ngua liasü.

Tetsür kija asaya nungsa world number one Aryna Sabalenka-i Hokolbarnü tanabuba round nung Japan tsür qualifier Himeno Sakatsume 6-4, 6-2 agi ayong ayonga kokogo.

Sabalenka, shibai Australian Open final nung Elena Rybakina mekoki tanabuba jenjang nung tembangba liasü, lai tashi maitba kecha mesayui world number 136 nung alila Sakatsume ya ayong ayonga koka liasü, shiba tang mezüngbuba top-20

asayar ka den asayarba liasü. Tebur kija asaya nung fourth-seed Alexander Zverev-ia Italy nung asayar Matteo Berrettini 6-3, 6-4 agi koka tasembuba round tongtetogo.

Asaya tepeyong nung Zverev-i break point ka danga majangshi aser set anaprongla nung Berrettini indang serve kaka break süa liasü.

Tanga asaya ka nung Canada nung 10th-seeded asayar Victoria Mboko-i 6-4, 7-6 (7/5) agi Australia nung asayar Kimberly Birrell kokogo.

Tetsür kija asaya nung Britian tsür Emma Raducanu-i 6-1, 6-3 agi qualifier Anastasia Zakharova ayong ayonga kokogo.

Ano Hungaria nung Marton Fucsovics-i fifth-seeded Italy nung asayar Lorenzo Musetti 7-5, 6-1 agi kokogo.

BILEMDANGANG

"Nü tebilembaji teti dangbo ajakibo magizüktsü ta metetdang."